

Il motor ha lavurà bain

Satisfacziun era tar il president da la pbd svizra, Martin Landolt

■ (anr/ac) Per reconuschienscha da la lavur politica prendan ils cussegliers guvernativs reelegids lur elecziun. Il nivelegi cusseglier guvernativ Jon Domenic Parolini vesa il motiv da ses success en sia representanza da las regiuns. Tip top haja el durmì la notg avant l'elecziun, il novelegi cusseglier guvernativ dal chantun Grischun, *Jon Domenic Parolini*. En vista a ses resultat d'elecziun d'astga el vinavant durmir bain. Il novelegi cusseglier guvernativ è satisfatg da ses bun resultat ed attribuescha quel a ses engaschi politic a favur da las regiuns. Jon Domenic Parolini è da l'avis che la derivanza d'in candidat na gioghia betg pli ina uschè gronda impurtanza. Las regiuns sajan pertschartas da la muntada d'eleger ina atgna representanza en la regenza grischuna. Ils problems da l'Engiadina Basa sajan convergents cun ils problems en la Surselva, ha fatg a savair Jon Domenic Parolini.

Cunscient è il novelegi cusseglier guvernativ d'avair pudì profitar dal ferm motor d'elecziun, *Barbara Janom Steiner*. E che quest motor dumogna l'elecziun cun in excellent resultat è stà cler gia suenter l'emprima retschertga. Barbara Janom Steiner n'ha betg pudì vilentar las votantas ed ils votants sursilvans cun sia refurma dal territori. Ella pren il bun resultat sco reconuschienscha da sia lavur politica en la regenza grischuna. E betg per l'agir en ina dumonda politica singula. La suletta dunna en la regenza grischuna è cunscienta d'in cert bonus politic sco dunna. Barbara Janom Stei-



Il nov cusseglier guvernativ Jon Domenic Parolini cun cussegliera guvernativa Barbara Janom Steiner.

FOTO G. N. STGIER

ner ha discurrì d'ina buna strategia d'elecziun da la pbd.

Mario Cavigelli, il candidat sursilvan

Mario Cavigelli vala per il cusseglier guvernativ il pli bainvesì en la Surselva. Là ha el recaltgà las pli bleras vuschs da tut ils candidats, sper sia vischnanca da domicil Domat. El valetescha quella attschadada a las stretgas relaziuns ch'el haja gia dapi blers onns en Surselva. Mo er en general è l'actual president da la regenza grischuna satisfatg da ses bun resultat. Gist en vista a las fatschentas difficilas en ses departament. Menziunà ha Mario Cavigelli las discussiuns actualas

en connex cun ils animals stgarponts. El è da l'avis che votantas e votants hajan reconuschì sias stentas per anflar soluziuns acceptablas.

Fitg cuntent cun ses resultat è er il candidat da la pld, cusseglier guvernativ *Christian Rathgeb*. El è pertschart che la politica da sanadad e las decisiuns da estructurar da nov il sectur dals spitals ha gia bittà divers collegas en auters chantuns or da la regenza. Tantpli pren Christina Rathgeb sia reelecziun sco reconuschienscha per sia politica persunala e quella da ses departament. El saja spruvà da far ina politica transparenta e da metter ils problems sin maisa. Cun quella

strategia politica vul el era cuntinuar. In mument pareva l'elecziun dal cusseglier guvernativ *Martin Jäger* dad esser periclitada. Il representant da la ps en la regenza grischuna ha dentant fatg a savair da nun avair dubità da sia reelecziun en vista a la mancanza dals resultats da la citad da Cuira. I na saja betg simpel per in candidat socialdemocrat da recaltgar vuschs ordaifer l'aglomeraziun. Quai hajan gia auters candidats socialdemocrats stiu far l'esperienza. Per positiv ha Martin Jäger valità d'avair recaltgà 6000 vuschs dapli ch'avant quatter onns. El ha vinavant fatg attent a sia lavur politica da lingua. Per quella politica haja el retschavi

blers cumpliments per exempel or da la Surselva, dentant paucas vuschs.

Sa concentrar sin la lavur parlamentara

Memia paucas vuschs per far il pass en la regenza ha per la secunda giada fatg il candidat da la pps, *Heinz Brand*. La renfatscha d'avair fatg in cumbat electoral memia reservà ed avair renunzià al cumbat direct cun ses cuntercandidat n'ha Heinz Brand betg laschà valair. Il candidat da la pps ha visà a la mancanza da deputadas e deputads da la pps en il cumbat electoral. Sias occurrenzas politicas durant il cumbat sajan stadas fitg bain visitadas. Sa concentrar vul Heinz Brand sin sia lavur sco commember dal cussegl naziunal. Quai malgrà ch'il vicepresidente da la pps svizra, *Christoph Blocher*, n'haja betg dà bunas notas al parlament svizzer. «Tar la pps na ston betg tut ils commembers esser dal medem avis sco Blocher.» Il candidat dals verd-liberals n'ha betg dasgà quintar cun ina elecziun. El haja dentant ditg d'avair fatg bleras e bunas experiencias durant il cumbat d'elecziun. Ils verd-liberals stoppian dentant slargiar la preschientscha politica sin il palancà communal per cuntascher dapli sustegn politic.

Fitg cuntent cun l'elecziun grischuna è il president dal la pbd svizra, *Martin Landolt*. El è persvadi da las abilitads politicas dals dus candidats da la pbd per la regenza grischuna. Candidats che respandian la filosofia politica da tschertgar soluziuns pratitgablas. Quella giada para il suveran grischun d'avair onurà quellas stentas politicas.